



姑溪居士文集卷第十六目錄

書

答李幾重司戶書

答人求所為詩文書

答吳子陽問翰林學士帶制誥書

謝人寄詩并問詩中格目小紙

代人與薛金陵小紙



姑溪居士文集卷第十六目錄

姑溪居士文集卷第十六

趙郡李之儀端叔

書

答李幾重司戶書

秋暑不審邇來起居何似不圖變故伏承遽鍾艱罰相遠且復未獲披奉故情文有所不逮想蒙見察某知先公才望久矣得之于賢士大夫之評每以未見為不足今其已矣何愴如之昆仲競爽而足下嶠崿人物之上某來疊見逼耳熱心搖恨未能促膝握手以慰欣慕專門之令昔聞其語而今見其人矣敢虞反我之懷而遽先臨問六月十八日得所附書未發已見其人

而喜甚亟發之不暇既發乃綿連相屬前之以相聞之久申之以過情之語終之以諸可人之詩文且復見躋于其間而責其不腆之詞展轉至此不覺慄然汗下哀晚不類得罪廢棄浮沉魚鳥間不復自齒于抑揚之地昂焉惠頌特相收采茫然不知所以為控方少年讀書時祇知古人所言為可師所踐履為必可力行以及之故諸可人皆疇昔相與厚善相勉以至于是者一旦奔迸流落七八年間在者無幾燦然到眼恍如相接于夢寐之際而紬繹其欽挹之語則知高明不妄取予凜々可信不為外物一毫髮低昂真我輩人也足下所養既尔而乃不遠數千里輕以人言俯暨蹇淺敏而好學不耻下問自期則重矣委

非所據有類倒置雖然未貺不可以虐故輒附諸可人以報盛德之及論省恕在人在我之厚薄以遠于不愧不作則至完之言是也論以己責人不若以己恕人以責人之心責己以恕己之心恕人則子夷傳家之言是也論未嘗以世不用而廢學問則魯直之言是也論尊所聞則高明行所知則光大而折衷于董子而不可以是以賢于衆人而畫焉則子開之言是也論乃所願則學孔子自期于孟子之志則定國之言是也論僅知古今實愧博洽而浪得名遂以阮嗣宗之歎為之證則明略之言是也合諸可人之論而反之于遁世無悶不見是而無悶樂則行之憂則違之及其用也有時而過涉滅頂足下高材遠識固

寶光齋
不待崎嶇所獻而當以深造而自得之矣然方且汲汲于此而幸庶幾焉者不敢不以告也適以疾悴偶在墳山程督工役邂逅元翼回使姑致其略嗣此當不輟交馳惟數學半君子其無意否耶瞻望未間千萬抑節自重

答人求所為詩文書

久不獲款近秋暑伏惟起居佳勝日者蒙面諭墳山諸石刻欲盡見之此自當墨以為獻偶刻字人招致不來尚有未完慮參差不足以奉省閱故爾蹭蹬因循晚矣負愧無量山中去城市遠耳目有間程督之外隨所遇輒牽課僅得十餘詩二賦一銘一青詞一書欲錄出以千斤斧然素非所工加之老倦退縮略

無可意處遂復猶豫又以不待有求而遽進則為銜鬻禽犢之學也君子之所深恥不圖過聽特枉書問引據該洽見徵甚勤初則茫然不知其對既謝不能謂必見察而來使接武至于三四而不已仰承厚義愧汗如洗遂不復自新而紬繹昔日之所欲獻者以報專委之辱資藉疇昔庶幾匠手繩墨之餘或遂管中之窺欽跂欽跂頃未與執事相接但聞在朝廷舉職事屢有所建明不知者則為有所謂久而得其歸則皆一時之先務不得而已者比涉傳一二藁則徃々人所不敢言異同之論無時無之要在我無愧足矣其涉蓋足以知一嚮之珍至于屬饜於所鯖富則寤寐不忘而未有以見期者一月前有錄得泛舟賦

永慕堂詩清曠亭記讀之累日乃知鯖與富未易形容端若快
意于九鼎之烹自非完養停蓄發諸家之秘而加琢削礪礪以
會于瓌奇則起伏能到既而端倪探賸果知留意于此甚篤古
人糟粕固已在所去竊聞平居專以歐陽永叔王介甫之文備
肘後之索甚矣二人之文乃一時之宗也長江秋霽千里一道
滔、滾、到海無盡其如風雨電之驟作崩騰洶湧之掀擊暫
形忽狀出沒後先聳一時之壯氣極天地之變化則吾東坡老
人未可以輕議雖時所禁要亦不得而捨淺陋所造率尔塵瀆
實則于執事所遊昇之殼中、央之中地而得之不審果以為
然否如其未也無吝見教未有參晤之涯倍深傾想

答吳子陽問翰林學士帶制誥書

春末辱惠書爾後欲作報不暇及來太平遂如在井底姑隨地
苟生聊復尔耳豈復更煩久遊紀錄然亦未嘗輒奉忘也忽披
手示尤佩見存伏審燕居雍容動履清勝欣慰所諭人翰林學
士帶制誥盖因唐故事耳昨奉行官制未曾申明姑相因而
行唐自開元末更翰林供奉為學士寵遇益重其地益親上自
六曹尚書下至秘書省校書郎皆可與選入院一歲遷知制誥
未知制誥不作文書但待詔備顧問叅侍行幸而已其在廷班
次只隨本官若侍宴則位序極高座在宰相下一品上雖宏文
館集賢院各有所隸獨翰林院無所隸學士號天子私人又曰

內相今既行文書遂帶知制誥其如制誥則中書舍人職事也
中書舍人乃中書後省官則是宰相屬官豈有天子私人號內
相而反兼宰相屬官職事乎既專代人主敷告以言主行制誥
批答口宣凡應和文書自不相干當時止謂知制誥遂還中書
舍人猶以學士所當制為相妨故不去今泛謂中書舍人為外
制翰林學士為內制則是也舍人止行誥詞押案遇有所命則
因而申之於言詞以達所以命之之意而行下至于制命則用
白麻寫從內降付外廷宣讀其詔書批答口宣等或直批送三
省或徑付所差使命事體不同官制行後凡此等合改正未及
者甚多至赦書則曰尚書省牒刑部尚書省一曹耳何牒之有

只當如麻制學士行畢從內降出宣讀罷付尚書省授刑部符
下諸道乃為允當足下謂不肖昔嘗任茲事故委曲見訪亦似
有所見責當時固嘗力言之矣會急欲成書在上者云未暇及
故因循至今論必也正名則不得為小事終必有類聚而時正
之者老廢寧復及此來意既厚不敢不報亦不須廣也未相見
間惟加愛

謝人寄詩并問詩中格目小紙

伏讀別紙諄諭作詩之意遂以佳句見寵委非其據流汗竟趾
不腆一介蓋嘗涉獵而老無所就但時得一章一句或可人意
則如盲人索塗而俄與之策日者有傳執事舊詩數篇拭目而

觀首前而吟充然飽足使一變之嘗如快意于九鼎也於是真有以寵之殆將屬饜矣欽佩何已亟欲有所形容不免謂為過情而取近諛之訐要之是詩也作者久不到此當于正元元和以前求之而復過有延揖使得條具前人所作之目而責其所以為是目井蛙之生豈足副九萬里而圖南者其如高議既及不敢不報國風雅頌分為四詩言一國之事言天下之事形容盛德以告于神明又以政之大小而分二雅此較然已見者凡所謂古與近體格與半格及曰嘆曰行曰歌曰曲曰謠之類皆出于作者一時之所寓比方四詩而強名之耳方其意有所可浩然發于句之長短聲之高下則為歌欲有所達而意未能見

必遵而引之以致其所欲達則為行事有所感形于嗟歎之不足則為歎千岐萬轍非詰屈折旋則不可盡則為曲未知其實而遽欲驟見始彷彿傳聞之得而會于必至則為謀篇者舉其全也章者次第陳之互見而相明也近體見于唐初賦平聲為韻而平側協其律亦曰律詩由有近體遂分往體就以賦側聲為韻從而別之亦曰古詩格如律半格鋪叙抑揚間作儷句如老杜古栢行者此管中之見妄以為同異恐古人自有佳處既無所傳亦不可槩知姑以其妄意者區處為獻不惜委曲見教幸甚幸甚

遠去侍席已復累月粹然如春之和氣儼然可畏之德威翼々然挽之不斷之誠意未嘗一日而忘于懷也此特小己所得之私耳至其深淺不可以意測形器不可以物拘習之者則曰善人君子也驟見者則曰不撓而有常者也曾不知形不加峻而頑猶屏息談笑自若而百廢具舉昔無夕不驚盜也而今乃外戶不閉昔一月率三四回大也今未嘗有醉人橫路則歌笑扶攜無一語相凌拂方且雍容燕席登覽陳迹與二三要人握手傾盖周旋于氣類中而往來賓客無問細麤莫不滿足而慙不忍捨去是豈沾激而然乎是豈緣飾而然乎乃知小己之所得乃聚人之所得也魯使樂正子為政孟子曰吾聞之喜而不

寐有問之者則曰其為人也好善好善之效乃能如是耶必曰至誠而已至誠可以參天地之化育於是益知昔人之言為可仰也其曰惟是而行之于廟堂之上則公已效之舊但褊迫自吝者率以迹求而不知以道而觀是未足為知公者又曰不將歸正鼎鉉遂一德以享天心而沛然下膏澤于民則今日之政信可見于天下矣是則有造物為其如是以有袞衣兮無使吾公歸兮無使我心悲兮此愚與衆人同也早遊門下特不敢自許于見知而中間恩恤之勤似非咫尺可得而擬議雖仁厚造次必於是然蒙被之獲固然不知其況也不圖晚暮獲奉均勞之便拊循有加礼意逾厚益信前日之不敢自許與夫輒謂造

寶洲齋
次必於是者皆私己皮膚之見也今夫寒暑之變有生所同而有得之深有得之淺者非天使然其所遇之地適然耳以是而推則所謂皮膚之見者亦非盛德之所期也碩大光明匹夫匹婦不得其所則如推也而納之溝中此伊尹之志而乃公之心也一介所吝不復繾綣以致其感然亦不得而已也

姑溪居士文集卷第十六

姑溪居士文集卷第十七目錄

雜書

莊居阻雨鄰人以紙求書因而信筆

又與鄰人書小紙

書趙鳳事

書牛李事

書楊綰事

書劉元平事

書柳材筆

又試筆

書陳格石刻

戲楊元發

偶書

贈人

書劉九思建茶硯屏

姑溪居士文集卷第十七目錄

姑溪居士文集卷第十七

趙郡李之儀端叔

雜書

莊居阻雨鄰人以紙求書因而信筆

日近詔求遺書乃太平甚盛之舉本朝書最不備臣庶之家亦多苟簡不以為事自昔隋兼南北兩朝經籍時富其所藏之地號嘉則殿其卷至三十七萬大業之亂存者無幾武德初終有八萬卷又平王世充得嘉則舊書八千卷自黃河水運入京師至砥柱舟覆而亡開元中置使置院專治其事然著于錄者又減武德三分之一通一時學者自為之書僅補其闕以甲乙丙

寶光齋
丁分經史子集為四庫安祿山之亂尺簡不存元載當國請以
千錢購一卷分遣使徧天下搜索稍、全復遂增四庫為十二
庫一目為四庫矣文宗尤所留意而十二庫方充滿復經廣明
播遷迄于天復遷都乃蕩然無遺又更五代之亂臣庶之家救
死不暇豈復以此自表見故本朝書籍逮今未振宋綬李淑二
家號藏書亦不過一二萬卷而已綬家又為火所盡其孫景年
方展轉圖足未幾輒死豈其數耶抑有所待也

又

油拳紙工所用法乃澄心之緒餘也但其料或雜而吳人多參
以竹筋故色下而韻微劣其如瑩滑受墨耐舒卷適人意處非

一種今夏末涉秋多暴雨潮水大圩田之水不能洩吾之野舍
浸及外限戶內着屐乃可行會莊夫以收成告既來復值雨寸
步不能施終日臨几案忽、無况雲破山出時、若相慰藉者
解后鄰人出此紙見邀作字既與素意相投凡數十番不覺寫
遍安得能文詞者相與周旋既為之太息而又字畫不工似是
此紙厄會所招也

又

東坡每屬詞研墨凡如糊方染筆又握筆近下而行之遲然未
嘗停輟渙、如流水逡巡盈紙或思未盡有續至十餘紙不已
議者或以其喜濃墨行筆遲為同異蓋不知諦思乃在其間也

楊文公與人對奕飲酒次人或以文為請即以方角小紙繩頭細字運筆如飛而與飲奕不相妨其詞又皆實以前世事對偶精密引據審確所命意燦然如掌握中而利害明白不容有所增損二公皆一時異人固未易優劣要之東坡之濃與遲出于習熟而文公之小紙細字亦非有所必也故知熟則生之生則熟之貴乎無所滯門尔至其飲奕相參而各能辨則東坡不善飲奕一小杯則竟醉睡或鼾亦未嘗放筆既覺讀其所屬詞有應東而西者必曰錯也但更易數字因其西而終之初不辨其當如是也

書趙鳳事

劉知幾吳兢撰武后實錄書張易之昌宗誣魏元忠子齋私謁廬陵王事嘗邀張說為証而說已許諾賴宋璟力止之說得冒以為忠後說當國讀之而內因屈嘗語兢曰劉子元叙此事太不假借兢曰子元已死不可受誣于地下此事實兢所書其藁故在說後屢祈刊削而兢終不許世皆以為今日之董狐也至趙鳳為莊宗實錄乃將何挺論劉胸䟽不載胸既相遂引鳳共政事去古浸遠所謂董狐者果何人哉

書牛李事

長慶初錢徽典貢舉李宗閔以所親托之李德裕李紳元稹在翰林密啟其事宗閔坐貶嫌隙自此遂結至太和中宗閔為宰

相會德裕召為兵部侍郎宗閔協牛僧孺併力擠之并罷裴度
政事而僧孺尤力朋黨至不可破侵尋四十餘年縉紳之禍不
能解乃有牛李之號武宗立專任德裕而為一時名相唐祚幾
至中興力去朋黨卒為白敏中令狐絢所中傷豈無心始可立
事而有心則訖不能濟使德裕不以前日為念而一心所事唐
祚固未艾也

書楊綰事

楊綰少孤貧獨處一室左右圖書凝塵滿席泊如也雅不好名
有所論著未嘗示人後為相時

室勲德方盛特

為之裁損騎從以避其高名清節名者實之賓也招之不來麾
之不去豈在汲、自炫鬻以沽之耶內不足者急于人知詎不
諒哉是等人也尚何足云聊以知有其實而名自至有之已非
是况無而自為有者乎

書劉元平事

唐霍王元軌太宗子與處士劉元平為布衣交或問王所長于
元平答曰無長問者不解元平日人有所短乃見其長君王無
所不備吾何以稱之人不見其長則為全人矣蓋其質既美則
動容周旋莫不如是譬之嘉木本立則枝條根節大小短長皆
皆中規矩繩墨見者一一知其為可用也又何擇焉

書柳材筆

元祐中錢塘倪本敦復通守當塗一日抵書相問勞藉以十筆其籤云河東柳材予時方學書得筆試之頗相入是後訪柳不可得而念亦不少輟異時予得罪流是邦既到首幸自償所念而材乃歷陽人死已久矣為之悵然久之過少廣書室得柳東所藝宛轉抑揚二十年之負恍然見慰問之蓋材族人于是知典刑淵源不無所自來也但予老矣字畫日退良有愧于疇昔臨紙一歎

又試筆

手和筆調作字乃佳迫促取能未見其可前人任為一事蓋藏終身踐蹈悲嘆窮通未始不在也退之序高閑謂僚之于九秋

之于奕詎不諒哉雖曰一技要瀕如是方盡僕知而不能行故白首如逆風駕船進寸退尺不圖誤有見索每臨紙必為見奪况手未和筆未調又迫促勉強耶似是此紙逢厄會定將覆醬甌矣可勝感嘆

書陳格石刻

予少時客廬山見諸刻石字皆有精神退而求其真蹟率不追也乃知模勒之妙有以假借致然是後每作字必歎息不得其人相與表發比過金陵所見如廬山時至其畫筆則又過之迨詰其所自蓋南康人陳姓名格從事于此十二世矣予固知他人必不能至是又以信予平日一見為不可易也凡技之善如

庖丁解牛輪人斲輪直以神遇而不以力會然後為得况十二世傳習之久耶彼微幸于一旦之遇者雖資藉展轉豈得不自愧哉

戲楊元發

楚令尹子西將死家老請立子玉為之後子玉直視則則于是遂定昭奚恤過宋有饋彘肩者昭奚恤阿以謝尔後阿則則更為歎息聲嘗究其所自乃得於此元發偶有系蒼黃失據屢詰之輒阿則予固知元發非二人者不知其聲從何而致諸知者注出

偶書

俊傑廉悍雅健雄深蓋嘗見其人矣既獨立于千仞之上則下視萬物如在掌握間足一跌遂致于訖死不復振故曰知所愛則知所養也不有其養則無異自卧于地以望百尺樓上其免于物役固難矣所謂俊傑廉悍雅健雄深者尚何足云終一問耳而相反如是所以擇術不可不謹也

贈人

丙戌正月九日過彥國明窓稍理蘊火取煖焚香烹茶脩然相向欲歸而德威遽至復坐笑語徐視几上散帙得老杜詩五代史廬陵歐公集宋文選不覺駭愕輒謂彥國曰子之膽過身矣已而抵掌相頤曰膽未足大始我學屠龍為有罪姑溪老人

書劉九思建茶硯屏

番陽鍾翁弱少有出塵意中間輒崢嶸戎馬間以功名互表裏
晚乃致位通顯然無妻妾所與俱者終一族子似己不自得于
半塗之失矣故每于世外人必從容展畫若相氣類者上饒劉
思道以術名于世嘗得其建茶硯屏云昔嘗相遇于京師臨分
以之為別其義不可忘也遂命工成就之予方有所適思道冒
大江特見訪于歷陽出以相示因以記其所自来亦以尋吾弱
翁之舊也崇寧五年九月十二日

姑溪居士文集卷第十七

姑溪居士文集卷第十八目錄

手簡

與蘇黃門子由

與龔侍郎深之

與蔡侍郎寬夫

又與蔡侍郎三首

與吳朝奉

與叔倫提舉朝奉

與宋榮州

又與榮州三首

與俞叔通教授五首

與何給事六首

姑溪居士文集卷第十八目錄

姑溪居士文集卷第十八

趙郡李之儀端叔

手簡

與蘇黃門子由

久不獲修記師門雖窮在途然竊借餘光不忘自振惟是耳忘
目枯求一毫髮洗濯增新無復可得以故系詠拳不忘鑿寐秋
深江上猶有暑氣不審燕居却掃尊體動止何似恭惟神聽冥
符日有勝趣萬事既不復經意則御風忘氣遂與造物者游矣
不腆一介尚冀投老餘息猶及款待不勝係吝之私更祈加愛

與龔侍郎深之

寶光齋
瞻望門墻僅隔一水然聲問不乏而歲時殷勤所當展盡于師
仰者不應踈簡如是臨分雖不敢輒齟齬其馳情繾綣不得為
無憾也春候已深日來尊體動止何似老境流落不圖遽遭此
酷永日如夢寐中夜間則申旦日不得交力量不充固深自愧
惟是四十年艱苦相依平時家事取給已不易堪而有一急難
則委曲經營不遺餘力情則夫婦義則朋友既使之到此地終
不得同歸念、祇欲下見蒙眷深厚未能執手號訴臨紙哽塞
不次

與蔡侍郎寬夫

不奉教晤已復累月懷詠重眷朝夕以之早夏清潤恭惟尊體

萬福于是遷徙已得所說亟圖躬問動止屬乍到不無應接之
冗用輒蹭蹬尚幸少休獲踐鄙志瞻望門第可量依仰

又

衰晚無堪實門下舊物永懷先公惇養之素與夫高誼延挹之
勤每以身生朝露不能少見毫髮為念異時東坡老人則曰拱
把必可以至千丈步驟方習定能萬里者於左右常一二流
落遐遠勢地日光明一見豈復可得可圖倦緒遽投挽引雖未
畏從容景暮所期然欣幸之深未易展叙也臨筆耿：

又

比到采石遽聞已過城中輒投先書具道欣懌持書人回方審

所得之妄已而又傳遂同何明道徑過金陵矣悵然不知其况
久之乃承尚留湖陰頗得求田之適即欲修謝不謂汨沒竟尔
淹晚初以此地或可少延 祿之頃福陋易得以乘加之宿咏
猶逞渠可一日苟安耶雖墳墓所寄亦將營葺就緒再理舊轍
萬一舍館定庶獲忝隨杖履之後也他俟躬致

又

不腆之役已滿任前期輒再請猶未報可遲暮竊祿覩顏何控
然黃緣覲幸粗寬待哺者之責尔召用未間尚冀周旋勝踐之
餘連蹇不類定應果慰此志否向風增吝

與吳朝奉

前日郊外拜別後二日有傳舟人未解者比再出城已不及相
見相仍幼稚多病未卜行李所之早失修記可勝愧仰計程當
已定館乍脫塵垢利害之役而有溪山隣里之歡想劇慰懷不
為加損固非待晚生縷々之獻愚者竟不免西行冒暑就陸其
味可知俟至閔中時得通問次

與叔倫提舉朝奉

久不親盛義間欲致一書或復不果所以系詠之深固不如是
也比承終制還朝稍幸班者獲奉餘晤進聞舍館所寓時得通
記不謂前日方遂邂逅斯須仰奉教益開浣亦多矣已而得家
門伯母下世哀苦累日不勝見在式假早來出就諸兄議成服

歸得墜刺乃辱臨屈謹諭重意且失迎展感激復深愧恨向晚
尊履何以無緣造謁尚覲促膝庸致久別之懷臨紙不任眷：

與宋榮州

伏審顯膺寵數榮進崇資叨頌有來聞報增忤伏恨阻遠不遑
陪下客以相先竊借光明但能知盛事之難值謹具狀賀

又

久不獲嗣音門下每于思道書中得聞動靜踈遠且復廢棄之
餘色：生理幾何其能自控也不審一頌之舊尚且記錄已否
初暄恭惟日來台候萬福新恩之寵非才望有以稱之豈能至
是無緣從賀客之後而又得之已晚比復當前而反茲蹭蹬倦

倦倍深愧負想像一時歆艷可量引詠

又

喬松巨栢非高峯絕壁未易為託以所託之如是宜其干雲霄
直日而未已也又况日聞所未聞日見所未見其資藉宜何如
或非肺腑惟義慰有自來豈能至此更期際遇終契超特欽跋
欽跋

又

晉卿家必常往還兄弟想皆顯達矣聞有尚主者得非宅相乎
別當修慶次因會聚為寄聲平時班：一見之而未嘗接語料
亦不復記省但寶坊一培土未易忘懷也臨紙哽愴

與俞叔通教授

暑中不審旅舍何似瞻企感義無從請叩區々可知高文聳動
榮觀然未敢廣傳朝入甌暮遍天下矣何時再幸占隸病茶脩
布疎略

又

寒色伏惟尊候清勝眷聚無恙至節日阻陪樽下為壽可量傾
禱不肖職事粗尔乍到冗瑣病茶不佳每愧誨言馳情不已早
晚西來奉有道君子引企旦々不知其勞耳感寒珍重時祝玉
音

又

前日連獲手教并盛文二篇曛黑索燭未及恍如在日圍中矣
既而研味高致非特如僕命騷人不知三代以來作者尚可分
路揚鑣已否神遊不遠竦然數日脾氣作憤々如醉人無緣款
曲承誨以悉別後牢結可知舟從定在何日啟行毒熱踰伏不
易處吾生不如意事十常八九每于左右眷々尚覲新春東去
再尋杖屨之適自餘不惜音驛交馳惟君子勉強于我也千萬
垂亮

又

近附遞修記當浼左右兩日連捧賜教爛然禮意兼幅不能盡
畧其愚陋尋繹所况浩乎若決天漠之瀦而注之廣漠之野難

堪眷遇重為愧戴伏惟待敵里中德况佳裕眷聚寧勝昔龐士
元為南州士人之冠以世論之則兵戈之際與夫一道德同風
俗蓋今日之盛也吾不知賢士大夫能相先高明以掠士元之
美否區、願親之誠非尺書可道指日以俟言款

又

伏蒙不鄙孤陋過示盛文大編衍溢眩然雖前日蹈海未能若
此文章久不到此惜乎先帝不與見也然神遊不遠固當有享
輒已傳錄願少寬假數日偶誦一二對於同舍中徵索者紛、
日不自給瓌傑偉麗一至于此尤劇賞慕

與何給事

違去門下遽涉改歲詠德懷眷尤甚乎昔氣候未定不審台候
起居何以哀晚一介雖託弊箒之末而從容敦篤尚懷素志其
如傾倒絕世之蘊欽慕出處之正蓋尚為左右頌之矣庶幾鋒
車未命猶及旦暮之款

又

早以山陽舊坟稍低下不免雨甚水不能洩河漲凌注念欲遷
者久之於是得上遠介盛德臨附一方與夫當塗令公部屬之
便固知仁人周恤必以是為急難而赴之必克然常情所期近
在咫尺隨事應見而已不圖光明俯暨委曲是同而今公不遺
餘力恐已事未必能尔纖悉畢舉上下翕然景隨存歿仰佩未

知所以為報雖已躬致其勤如是此念何時可忘系詠之深責具申展

又

急足迴倉猝具書當獲塵浼稍不果嗣音推重在先引詠舊眷不忘傾屬早春不審起居何似久為人物所先加之有勞簡在淵密豈外計可以遲回者流落倦途尚期擊節迅除少慰向慕尔遡風耿々

又

罪廢沉溺無復舉頭之望邂逅舊遊仍值提按之始恍如斷夢感慰可知歸來幸異葬事然望德門自是愈遠矣興言所暨倍

深依邑胡族淪落聞振拂不借力是亦仁厚所期要之于時猶不可及也的便中卒尔馳附瞻望弭節仰冀善衛

又

前日獲侍樽俎新築落成瑞應表發仰佩不遺與觀成美感激不在言也低回里巷雖側聞盛事而哀遲不振愧無以形容蕪陋之語以致一時之遇過蒙延挹置其不逮而曲與之進敢不矜勉以奉勤眷持斧般門固已非據而老筆在前姑投一笑之地而遂覆醬瓿乃出望外矣適在故山不果躬致賤懇仰冀深

炤

又

分餉柔毛何以克當但恐餉德之餘歲神見夢羊蹴蔬耳某物
若干謾實四奩非敢為報也餘遲旦夕面謝

姑溪居士文集卷第十八

姑溪居士文集卷第十九目錄

手簡

與何給事

再與給事二首

與楚守賈朝奉

又與賈朝奉

與金馬部中立

答金中立

與金中立五首

謝金中立

與金中立八首

與蕭季文知錄

與彭丞

與孫知縣 希賢

姑溪居士文集卷第十九目錄

姑溪居士文集卷第十九

趙郡李之儀端叔

手簡

與何給事

某為公家客久矣雍容談笑雖粗領風味獨未得于利害之途
盤旋多事之際心固疑之而誠或未盡傾向也於是炳然乃知
所疑為自失蓋德度之接無不主于至誠而加惠哀蹇迥出常
矩古人謂感慨則有之知己則未也不虞一旦兼獲蒙被而其
自失者愈知為可愧矣霜候盛寒恭惟台候起居萬福方遠叅
近更期以時保練即慶遷擢

又

此來不謂已晚汲、所役僅能襄事故早時所願得于叅承之日三分不及其一末路何堪廢于此念或不見員今亦尔耳則其他可知不審高明亦知梗槩否浮雲去來星日固在殊命之慶定在新正不妨激昂懽緒自收未去之日為邦人不可及之思也獨不果竟投勝韻執筆憊、

又

稍不獲瞻近懷詠高明尤甚平日冬候浸寒恭惟起居佳勝哀晚待盡而已既遂叅承之願則其諸一付度外尚幸再約趨風以竟款叩爾屬心門墻筆下何可見也

與楚守賈朝奉

託如疇昔常謂淪落異地無復叅承之幸遲慕何堪遽在末軌欣佩固已不貲而歲晚相求可量欽系江上苦寒履况當復何似借地為客咫尺即在要顯尚稽展晤倍劇傾馳

又

日者馳控特未卜見錄已否書來悖叙流渥豈勝愧戢里中人情易擾風物飲食粗如人意伏計坐嘯之餘居有多樂老境何日獲從井上出遇庶幾政績超騰經濟華近而缺甃之間擊節為應也

顧親固久冗路低回無階自達而復不當行李之便留連鄙念
蓋不待說而後知也于是遂有叅承之幸則疇昔湮鬱殆將一
洗無餘矣求之異時端若有數霜候早寒榮戟間闕近來不審
尊體動止何似見上應恨相見之晚斯民懷慕非一朝夕不妨
就陞顯職暫為一方之福雍容少日經席華近以協僉言也區
區尤劇欣跂

又

自承命下累次屬郵吏侯大旆所舍皆報以未得其詳繼聞已
赴汝陰即紛走介脩慶就闖起居尋獲邸申方知遂席新渥猶
未諭取道之方今日覩公移乃知由亳宿以赴國門竊計朝晚

入覲徐卜所向區々上記淹遲庶在矜惻

又

陝右古郡風物飲食皆可人意雖曰道御賓客多自城外往來
可想及者有數固左右即可之地而偃藩之勝似亦少能過之
者筆吏已遣接人并什物供帳等一一如旨誨謹已嚴備為待
矣州宅深覩老木頽頽相錯北顧大河天下之絕觀也不妨暫
快登覽之適遂還寵要在人實為兼盡他有所戒敬服來命

又

日者得漕檄至長安既到而諸公皆並邊矣遽承此委欲訢以
為不可得且不謂住此許久方其往尚有殘暑凡禦冬之具皆

不隨此已盛寒營葺不及甚以為懷大旆之來非特邦人聳跂而愚者恭承為至幸遂獲早歸自是私分上一不易得之事伏望稍促行軒不勝朝夕引詠

又

此距京西才數十里界候最為淺促凡事隣邑不相關如大旆果欲少慰斯民之望敢期出郡之日豫戒邸吏或隨行人急走一報州郡迎候自有常數不宜使之失備且不及也惶恐

又

門中貴眷伏惟萬福今必同行矣東玉金玉想不輟通問二舍各計安勝近皆相會已否容另附承動靜

又

近專遣人至京師上記竊計塵浼瞻望采旆我勞如何適得報審將叩境上方此盛寒尊履佳勝諸懷非侍坐不展遡風眷

又

承大旆已過國門日與斯民跋望玉趾淹回敬問蓋不豫知遠近皇恐不能堪亦望有以見亮苦寒伏惟步履之餘尊候萬福諸所欲言畧具前記要非促膝不展前驅在吾肩睫間矣欣慰渠可名哉

又

方欲脩問專介遽被翰墨存拊愈厚感佩無已牙兵衛從州郡

常禮但愧遣行差緩尔或尚缺用當以見告應命更佇委報

又

違去門下忽行投之拘不時上記亦意有以察其過而懷詠眷
存常在依色獵寒比日不審尊候起居何似高明豈今日持節
明日擁旄者從容上前極口論天下事使在廷聳然有疑得質
遂皆信恚以席華近以慰一時傾想而久未我契者願豈遠哉
修塵紬繹執筆敢吝

又

鄙拙早不如人蕭颯異時詎敢覬幸于知遇然徃來伯仲間亦
久矣其如解后綵衣之餘猶記彷彿而契義自求又將報轉蒙

冒迄未可得悵然此懷每惧終失孰謂一見欣然遂叩資藉延
揖之盛以所獲于動容周旋而遺靈假寵之如此茲豈平々可
見其盛遇耶至于樽俎豐隆祖帳華茂傾一意于俯格而至巷
無居人則剪焉弗類其將何以為對歲晚致効幸或有得 風
耿々

又

迂拙背馳自干吏議到蒲聞罷黜尋欲泊家一面赴調干法須
候交代不免迤遷西來所至親舊留連又繼得漕檄俾徃長安
凡四十日方到故復淹滯送還人不免有妨差使恐悚無已不
審雅眷能復矜照否然路中雖苦寒碩恤亦備盖走失才數人

耳代者在蜀中杳不聞耗勢當春初或得就道此中與比近有
幹委事敢幸不外至祝至禱

又

陝原僚友多佳士水鏡固不能逃其如春首有將替及垂成者
不得不仰國門下敢望留念吳節推真實有守敏而能文以其
真實故人少知者司理董君介廉強果事多賴之二人乃將替
者其他尚可有待于異日僭易展轉皇恐皇恐

又

違去麾戟遽復踰時歸計既尔蹭蹬又軍事擁來意况實極惡
有愧于牽窳書問不繼果信其如見我春候寢暄伏惟靜鎮之

餘尊候動止萬福陳力四方使節少休便當潤步華近尚爾低
回是豈在我不及耶天人未始相遠即慶衰異別對殊渥

又

願親固有日既幸資藉乃不得為從容計退訟歉然每自日下
來者皆能道經由瞻見比日起居之詳輒用為慰區區代者不
到四月中定獲叅展未間更祈善衛

又

蒙約意亦忽々每圖明窓軟火清坐相向間作無我語以披氛
翳之楛定將早晚可遂也陝服號當路然事絕簡應接亦稀少
向上工夫能不退轉否

又

昨日侍坐不甚款晚熱猶可畏勢難稍久然所得于盛義亦多矣清晨恭惟尊履佳勝時序忽々曝衣乞巧遽見節物豈老境歲月易得然即可喜亦可嘆也早晚再圖展近

與蕭季文知錄

比承當路或不相容不敢仰叩所自此者遂知朝論取直公理終不能展果有是證君子不苟避就又復時評在已耶然則超然遠舉似亦無足猶豫要之待其至而後動無自皎々或取愧于從容也仰投氣類輒尔借况當塗風物自可領畧果不屑其陋則旦暮周旋私幸一何多耶襄陽固不惡盖剽聞餘論故利

害因得自警不勝翹跂小兒官期未決亦欲月終遣行雖託庇不久要亦資藉契好尤重攀緣之澤也偶作十餘書不暇備悉別圖申叙次

與彭丞

久不獲申致門下為力有限而所應不一忽々易成荏苒馳情眷舊未易咫尺可論也逼歲到家首辱流問所以不相忘之義尤見惇篤時序推遷恭審廬次支勝瞻望一水未果躬叙其殷懇之深尚冀併得展盡向風固然

與孫知縣希賢

既不入城無緣瞻謁來者頗能道見恤之語感愧無論秋爽伏

惟動履清勝旦夕遂歸系望軒屏倍深依向被召北行庶幾迎
謁

姑溪居士文集卷第十九

姑溪居士文集卷第二十目錄

手簡

上宰執

再上宰執二首

又上宰執

謝宰執

上宰執九首

答宰執

上宰執三首

姑溪居士文集卷第二十目錄

姑溪居士文集卷第二十

趙郡李之儀端叔

手簡

上宰執

罪廢苟生屏息窮遠瞻望門仞如在雲外固不當輒修記室之間然恩出一旦義均存歿是豈平所得而擬議者雖分同腐草其如餘息未殄則其情可容自也即庶幾憐憫特賜省錄是身幾何顧不足以論報効期于結草則猶未離乎類也切謂隨所愛生此念常在一語儻誣天實臨之引詠恩施形留神往

又

非意之酷莫此為甚儻非姓名猶在記錄則安能遽有茲幸恩
旨既臨舉家慟絕以所遇之如是則其感激銘鏤不待形容而
後可諒雨露不私于草木而草木蒙被自有淺深自非力回造
化未易有此服天地之仁佩鈞陶之錫雖多言不過于此其惓
惓所系惟自信其無有窮盡也

又

壬午歲聞被召自穎昌亟來獲見于國門外舟中蒙問勞甚渥
矜惻相仍未幾自以罪去流落江上十五六年方其來時一妻
一女子與其婦一孫并身而六相繼哭之念一身獨在晚才有
此兒實相與為命而交造者知其如是遂用以快意果得其實

固非所辭而乃繫風捕影巧為訟端一墮橫逆又復五年不惟
父子生離而特以官年六十有八豫計當叙之年則已七十遂
當致仕祿食不繼固非所恤遂將自此以至屬續終不能脫于
罪籍矣欽承至恩大德天地有盡而此則無盡使瞑目得為全
人捨息地尚何望哉向風不覺酸鼻

又

暑候滋熾恭惟雍容陟降鈞履萬福其哀晚一介于世不異疣
贅流落既久不自知其生理可乘而日期朝露之奄先每念獲
齒門墻雖未得從衆人之後承顏接詞周旋盛德之遇然所得
所蒙固已如萬鈞之重常在負荷而若不能勝端所謂子在回

何敢死尚以是僥倖而苟在也隙馳荏苒忽、踰年霄壤夏絕
其交則氣與識尔盖無時不在光明中亦間容僭易輒通記室
之問其如破甑敝帚不以廢毀而居有眷、不忍終廢之意佩
戴之深尤覺未即仰承旦暮為可憾于是義益高矣情益厚矣
瞻望息席翼、不暫捨于眉睫間咫尺將自慰其繾綣且覲束
胷以見從而叙謝則方且圖之朔風倍劇向往

又

此者伏蒙上恩特還愚息遂永祭祀之繼祇奉俛伏揮涕不知
其已闔門悲感真若再生九原不昧啣仰可知傳聞里巷一口
嗟惻流布所及莫不聳動具承天地之德不間幽側至深至厚

而螻蟻微生草芥賤類驟尔叨蒙果有是事耶夢寐間也眷言
此義倘非極竭展盡渠能至于是哉計古則或有之於時實未
之見瞻詠門下恨無羽翰可借而縮地之無術凡屬枯株但驚
根葉頓有敷榮之向亟將自効于躬致一言之薦而未得尔
紙哽噎筆不得下者久之

又

自罹非橫五年于茲雖愚昧或致分同腐草而家世之傳無斯
頃少忘困伏井底惟飲恨忍死期于尺素之得伸而有再瞻天
日之幸然而捨門下其將何地可控耶早日得報備載生成之
意出于特達故缺甃間覘、不知自己夜以繼日尤如在沸鼎

中前月又得報知德意已輒而天日遂將矣目窮心匱門月而方得之於未得間其情可知既得之則其情又可知也姑急馳此介略布其端餘俟迺遷申展次

又

人與己雖父子之戚矣有時而不能同地與勢若風雲之會矣有時而不可合何則人各有所見而事亦有所礙父子可同也乃或號泣而隨之風雲必合也亦有去來而相背况君臣朋友之際哉以是為不易必又以甚賤至微未嘗接眉目通語言遽蒙忘其不同與相背而一語之發如石投水遂使挾山超海不為之難而枯木寒灰果至于再作理固莫窮而世亦莫之遇也

今日之事是己蒙被己還惟自嗟駭不報之恩百身何據然上雖不期報下其得而已耶百身有盡而志則無盡神理其遠哉

又

竊伏草莽十五年矣殆若根蒂連結毫髮不容相遠自冒齒錄即有請見親依之誠初不謂蹭蹬至今己而不腆之所懇惻或與之展轉資藉上投拯援既荷憫恤三二年茲遂欲申其素志心徃形留以日為歲尚尔差池竟至不離尺寸而坐受大賜雖高照、徹其形迹之間可得不愧不忤已否止候借置目前猥瑣坐圖操筵平陽之門矣仰冀重德厚恩終始矜察

又

久欲一望見門墻而淪廢孤外猶未得為全人故蹭蹬未果自
達老日益迫一旦奄先朝露則賚恨九原而自絕于一代人物
也既付與遭遇之如是而不昇之以年其造物者果有意耶抑
無意耶雖誦其詩讀其書不失於心期亦非得已而言尔幸同
聖日可使有憾于異時乎溯詠之深罔然如失

又

竊伏榛莽瞻望門墻如隔霄壤然聖日光明同在一照臨而系
懷覆盆之下私淑為深尚稽恭展伏覲上體眷注倍保崇重

又

恭審蔽自上心圖用博器遂膺制拜迎愛旌旄中外懽忭一口

翁如是乃儲養有素理自應尔無階進陪賀客之後延詠高牙
倍馳丹悃

又

禮成樂作德化日新黼黻聲名輻湊遠近權衡所倚則端蔓勞
腴各得其適真所謂粲然如繁星麗天而舍次之辨捨五行何
分斯人望而畏者實仰盛德何日親被提振向風罔然

又

近者輒以專介上浼記室蕞尔蝼蟻之誠諒獲塵控春陽不期
于私而蒙被之歸實均纖草踈外鄙朴不知恭事之容但獻芹
炙背知其愛而不知其有犯更在於矜恤有以亮之

又

司勳張大亨舊學曾子固為文章整潔有程度而不妄形容蓋一時之秀也頗聞收采學者之幸

又

繼有所介冒塵記室特以未遂叅承心如欲墜雖可謂激切然勢莫之應息地常有眉睫間定將何日獲瞻望忽々初暑日來緝熙羽翼益被穎信天人所符台候動止萬福造物既有以鍾之其必有以成之一代光明何啻六五帝而四三王也所以周旋至是者復何人哉草隨風靡不自知一介踈外之有間執筆耿々

又

伏承討論之暇儲思前日翰墨遊戲之蹟流傳所先想已充物緘襲而近時所期如眉陽老人龍眠宗子固非俗格而似亦不易得者輒意列鼎之飲不能無澗沼之毛山林之茁投間而進舊有老人戲墨六扇一硯屏所寄所錄詩兩軸龍眠所畫松上道人一軸御馬粉本一軸乃盡所有而得于散失之餘者舉以投賞鑒蓋平日與二人稍款玩于朝夕不知為可貴隨得隨失不能保回視既往遂覺不能多取而謹藏之深可憾者別有家傳吳生畫天王一軸此則開卷便可知上乘息遇殆以先祖得之迄今百有餘年甫為茲日尔借易塵控諒矜賜察

又

竊謂既為門下士則于門下種：不應有間方先公啓手足以
至奉窀穸皆不得自効于衆人之後哀挽：所相又後時銜恨
抱慙無以為控乃僭易狂斐有託于記室不虞委眷逾厚遇形
謙謝伏讀愧畏莫知所容又復一時迫于修附不果親寫雖情
文未至鉅錕而私懷不能無所負謹繕寫上呈伏冀恩私特垂
矜亮

又

每承真翰未嘗不反復吟諷幾至成誦紙敝墨渝欲捨不得語
高而意盡藻續見于隨得信絕世之文雄也平日頗有味于此

自獲委眷頓諭平日之習何止效顰愈陋端如欲避影而走於
日中其超然自有到處何可得耶以是弥恨親依之晚而款席
之尚遠也

又

此者專人回跪奉親翰欽承隆厚揆非其據雖包荒固不遐遺
而佩服之重既榮且感輒欲効灑旬申展又慮接武記室五技
易窮其繾綣一介之誠則其勤不過如是瞻望恩地但劇歸向

姑溪居士文集卷第二十

姑溪居士文集卷第二十一目錄

手簡

上時宰

再上時宰

又上時宰

又慰疏四首

與祝提舉 無黨

與祝無黨

又與無黨七首

與朱元章四首

與小米元暉

與彭學士六首

與劉延仲

姑溪居士文集卷第二十一目錄

姑溪居士文集卷第二十一

趙郡李之儀端叔

手簡

上時宰

初暑伏惟鈞履萬福此者無前之寶鼎然傑出穎卓之才因事
尤振丕告列辟輝映相盛雖參以他務而并舉之然超軼絕塵
則在是也加之制語有法事詞為稱辱在題品遂因諦咏已復
成誦于所能誦則如見其人惟是不得從賀客之後倍深依向
不宣

又

某自徹聲迹濱二十年固能時見一班于管窺文豹然親承警策如前人雖萬戶侯有所不顧者定能終有茲幸已否門庭愈不可及諸有志者投間互進所長而規矩繩墨各得于一顰一笑因其所有亦或選掄之及拱把便知其材可指日遂至于合抱也萬牛回首一柱特表自揆則非其輩類如得一竊嘆于衆人之後足矣臨筆增吝

又

某哀悴且復拙于養生而又傍無攸助故家食之日少而農務之力多是亦造物者所以付之要之竊慕末軌其目寓手應固當因時以勉者氣已不振而牽制復乘之真見負于幸得之際

而有憾于無窮之暝矣尚資竿牘之賜時輒興起願親之勤尤覺既高益遠矣

又慰疏

某疏言日月流逝伏審先政太傅已經除祥恭惟攀號躡踊五內分崩糜潰煩冤何所逮及孝思奈何罔極奈何某伏限在遠不獲詣鈞屏祇候申慰瞻望摧哽可勝欽系謹具疏不次

又

不審近日鈞履何似伏冀上體眷注無或追遠之過與時御宜益茂久大

又

比者以所賜二經并寧先賜鍾銘見寄者欽承至性知無以為
泉下之報而上憑佛力以嚴因地可勝畏仰先公履踐之素不
待資崇固應超特其如純孝之篤深體增上有教而恨無以自
竭也謹當十襲時出而讀誦之少助勤至亦自效其涓埃也鍾
銘輒忘其鄙而夤緣於諸作者之次僭易呈浼

又

祥除之及以僻遠豫不得其日故修叙獨後然禮意不得而略
庶幾恩炤有以加亮不遑致恭焚席仰承變服但引詠巨愴遙
深哽塞

與祝提舉 無黨

昨日庶幾展晤不圖鉏鋤良眷也早來伏惟起居佳勝專介
被問所以慰藉甚款感愧無論行李稍遽不獲瞻望倍深約結
介還方食具記草率皇恐皇恐

又

早來辱訪別少親妙晤尤慰披寫日高尚寒恭惟起居佳勝於
是大旆經行首賜臨問遂獲周旋燕俎所以存拊款盡鄙陋何
以為據非氣類曲敦疇克如此感服銘佩倍深繾綣適到津亭
已失浮驂度其勢不得申敬行色系戀之迫庶幾見亮

又

某流落屏處不復通好游舊雖欽詠不少忘然門地日蓋遠矣

比辱暫屈使指但竊為一方致慶而不敢輒投繯縲于是弭節
尚意猶在省錄踟躕願致之勤滋恨無地不圖加惠曷臨遽先
翰墨敦諭款悉如接盛遇秋冷感激而已他佇續貢不次

又

拜別忽、踰時系詠雅賸但深約結累日方始行主於一見門
下而北稍傳按部將復經由以故少留仰俟瞻叩遽先翰墨委
諭詳盡尤佩不忘之意伏審乍冷起居佳勝百臆湏款席可究
不勝拳、謹具叅問

又

日者大旆經由函走行府切承會食州中已而聞改轅北去竟
不獲一奉教督歆焉鄙懷跂詠不少間庾伏途日不審尊体動
止何似瞻望榮戟有必可見之地未有具涯向風可勝約結

又

準擬還自信州便道獲款蓋論不謂行李甚遽但劇引詠相繼
便圖上記五月中感寒疾已在必死之際偶尔就安然汗雨復
作淹回幾五十日矣今又愒、氣僅相屬書問不時端係于此
亦必有以見諒久聞府事嬰拂雖一方蒙被德澤其如方暑小
勞應接不無自累也達吾之所自信者以聽之固知無入而不
自得也日期便道叅近倍深聳向

又

某到太平四周年第一年喪子婦第二年病悴涉春徂夏劣然
脫死第三年亡妻女子相繼見捨第四年初則癰瘡被體已而
寒疾為苦于其中間人情不相當靡所不有自忝冒叙復便欲
迤邐北歸日復一日今幸苟生勢不容更住矣輒不自外門下
之舊濱二十年雅辱知憐且非旦暮于是如在井中去死地間
不容髮引睇尺素何啻再造故忘其僭易上干使臺暫借一寬
舟只至山陽度往還無四十日自不妨別差使萬一不在所絕
敢異此月下旬或二十間得之幸甚先望賤付照牒仍得一寬
潔差新者一家并亡妻靈柩同載不得不慮皇悚皇悚

又

某賤累三房二十餘口又有靈柩先因唐欽叟處一舟般載不
盡又唐舟年深踈漏止可載輜重幸小子除服合得一舟不得
已上冒其詳筆下不能見但日即舉家如爐炭上果蒙曲應殆
非平日可比伏惟恩仁俯契真切悚息悚息

又

某五月初寫下前啓相次得疾故脩浼淹緩自取留滯之累前
啓更不易庶幾見念知其意非今日也皇恐皇恐

與米元章

八月八日某頓首再拜漣水使君元章公閣下伏自拜違行
四年矣書問不繼相遠之勢然也到京見交遊尚未遍其見者

道公動止與夫政事之在人口者十居八九則知吾元章公有進而真不愧吾欽挹之素也如何如何秋高氣清迺日不審尊体何似行有召命未聞千萬加愛謹奉狀咨聞

又

某上啓元章漣水使君節下近委權貨遽當已塵浼京師自六月至九月雨連晝夜不絕氣候已如冬月不審淮上如何伏惟政成民樂履此初寒起居住勝南來者一口交譽謂自過揚子渡行路無不咨嗟頌詠每道及公名姓則以手加額上不謂至此而猶未還召其勢亦不能久矣更善希愛以對之

又

某啓末路間閔獨得于公為多不謂一別便不蒙寸紙則平日眷：殆將委如草莽耶抑將有待于我而然也近見子魯曾公書道公學術高明政事疊：挽之不斷企仰何及漣漪古郡拒我松楸終一水風化漸漬我亦公桑梓之民也未能輩父老申敬麾下可勝耿：或未見忘時賜書教

又

改月伏惟起居佳勝祭享傷感殆不容遣免以故先承降問兼辱元暉下頌敦叙稠重尤劇佩荷見命晚集敬當祇赴只是食素不必具肉幸甚輒欲更求十數幅字如此紙可用否必欲得何色目乃入用先告示及當携往也

與小米元暉

納紙為請別自一段因緣恐兩彩一賽輒煩過庭為了之仍早
得之甚幸流落人間乃是超世之物不易得者今日之過也挂
念挂念

與彭學士

某啓久別教席仰詠不能已暑伏舟行良苦尊候起居何似區
區欽佩緒餘常有願親不足之懷于是又將西去瞻望數千里
未卜承侍之期臨書黯然敢冀委時自衛鄙誠千萬蓋非書所
能盡竊幸矜照

又

自承召命日計行李須郊外迎見遽領教墨深愧已後時矣將
聞德論誨咫尺欣浣可知

又

兩日少故阻奉教席瞻向盛德義不少忘恭惟從者無恙承今
日殿對遂即黼座問勞之際相慰淵衷佇望之久方出局偶餞
一舊僚出城明日當叩師几

又

久不承師誨雖再具書而瞻仰拳之蓋非紙墨可致者其欲見
之心朝夕東引伏辱子教曲記過存伏審赴召已次都邑霜寒
尊候起居萬福出局遂造席末區之謹俟侍坐

又

孤苦待盡久不得君子之教雖餘喘不復自理然向往之私惟日比詠述至忽辱手筆藹然風義未忘罪罰而遷官之慶有愧為問之獨緩比日復不審履既何似恭惟庭闈康靖眷聚均福書成尚在改歲常格所拘稍滯雄奮古者治定功成之際玩心神明而沉敏之材多後於躡等良務寬大以竚類求

今早講罷即詣直舍承駟衛已出晚尤毒熱伏惟尊候動止萬福少慕下風比得親侍將一月切仰高明欽戴無已會此遷改遂失依賴下情瞻戀何似可言拘文非假不敢輒詣墻屏謹奉

手啓

與劉延仲

前日遣門丞暫出翹仰為懷連日出城倦甚遠方見中間所惠簡尋失為答悚仄悚仄秋暑欣審侍奉萬福馬以病足見借馬出入亦必無用矣他日望宿戒也一二日相見有客才起草

姑溪居士文集卷第二十一

姑溪居士文集卷第二十二目錄

手簡

與姚漕

又與姚漕二首

答姚漕

與姚漕

與周漕三首

謝周漕

與和州太守曾延之少監

又與太守曾延之

與元祖慶法曹名億

又與曹名億四首

與龔平國

再與平國

又與平國

姑溪居士文集卷第二十二目錄

姑溪居士文集卷第二十二

趙郡李之儀端叔

手簡

與姚漕

某望恐上啓運使戶部節下低回仕路常在光明中地偏人微
無從瞻望比承振采一道而里舍所寓遠依庇昧欣慕所期實
均有象首夏清和恭惟尊體動止萬福系詠門墻未獲通名將
命尚冀哀遲或在記錄不宣

又

屏處江上忽二十年疇昔難忘常在欽挹敏茂該洽表儀多中

故省戶使臺繼膺寵數而勢地既阻無從修記其知懷德固不
少懈也此多在墳山失于承候今已在衆人後笑亦鄙分所應
尔也餘塵未拂尚幸按臨得從賓客之末乃所願言庶幾侍坐
披恚

又

退縮里巷實依德庇眷言疇昔蒙被有加拳、負荷之深未易
形容可究也冬候未寒日來尊候動止何似委寄固重而隨地
振采下受其賜上收其効日聳褒顯遂膺柄任非特一介私淑
而然乃公論之所歸也引詠門墻可量仰遡

又

中間使人蒙枉教尋欲脩叙而持書人已不見差池重意之辱
寄頽無地哀晚兀、待盡而已比門暫總帥事輒期一見以酬
素志蒼頽白髮仰附後車之載或能上助仁者愛老念舊之樂
私庭無助凡米鹽瑣屑率身履之用是蹭蹬向風何已故都可
擇之勝固多乘時抑揚不妨自達順御而起見絕韻因以付之
翰墨足為一方無窮之美觀也 烏哀舊實與榮烏臨筆倍增

跋頌

又

溧水縣丞李宥者和文都尉家賢子弟也和文樂義尚賢天下
學士大夫歸之其風流所暨至今凜然而宥不獨有其家風又

能悉心政事所可稱美幸託臨屬前有政官收四紙矣垂成之際一舉則其德倍于他日伏望特達俯踐所請不勝企祝方此閑陋不當率尔為言其如久荷眷遇亦以仰報也皇恐皇恐

與周漕

某皇恐上啓委質後塵雖不能早暮師承然竊借光明常如星日之下臨也不腆之後久益加冗：故稍不獲脩記起居系詠拳：當不行講而後譟冬候微暄不審尔日尊履何如早期數月間獲依門俛荏苒不知所計殆無以自名其况尚冀未遷召間猶及俯慰

又

某三月到此稍為完葺蝸陋以陟夏大病甫秋即入墳山前旱後雨以物理特有以見制竟以工料不契暫歸以俟春暖間承接部經田無過必見問以至親屈大旆臨顧蓬華所以加惠哀涼然嘗求比於古人而繭烏何堪未易負荷高明一時人物得一望已為遭遇而委曲瞻存之意有加無已非今日之事也臨筆倍深依向

又

逼至節方自墳山歸恭聞大旆經過終信宿失此參近重以為廬已而捧所墜教存拊踰厚紬繹增愧退揆畧無可採而盛德禮意日隆定將何地下酬茲幸向風固然

又

伏蒙親寫別幅留貺朋樽飲君子之德而研味委意之寵如奉
款席可勝欽戴又復起世翰墨文詞之盛璀璨溢目一時榮遇
未易形容也不敢別具公狀為謝深恃異矐

與和州太守曾延之少監

某啓近遣專人通問上謝當晚鈴下乍晴遂有春思隨時抑揚
想多勝趣系詠雅眷尤極繾綣適日復不審尊體動止何似鄙
陋還家濱一月愛民惜物之譽日有欽向以華門圭竇得之已
如此則士論騰播組織於文字語言間竊謂君相已在紬繹矣
入奉禁嚴藻績世德是乃一時之盛事也夙庇後塵弥用擊節

又

某到家即欲作書因冗瑣遂已淹晚前日方克展叙不識果有
以見亮已否游定父行欲申敬問適有少故輒不暇及某家人
回具言佳客憑陵連日醉笑竟使積陰廓徹萬卉紛敷以成同
樂之勝獨不得展轉末軌但深引歎占高南望吾家山水實在
樽俎間能復指頌俯及哀舊而恨不得與之周旋否向風耿々

與元祖慶法曹名億

近聞行李之便謂得從容明爽展盡系各往見不遇辱頌相失
晚節僅能一接語遽驚操袂殆若有以主之於今不自己也既
而遽圖脩記道此不滿荏苒不契于是疾病乘之幾成踳躄高

義可懷要須水雪可鑒未間與時御宜以期絕詣蓋君子相忘于道術非只尺低昂所計也

又

某自到貶所即聞盛義秀粹樂易應接無一罅可指固願奉從容仰借振采數因所往還以間舟車假道之際久未我與可勝牢落異時投足治下私幸可以更僕承教初則適有所未暇既而服食差爽稍謝通詣迄去僅一識而追訟每日邑：比拾策又復草：搥袂然所得度越所聞亦多矣晚節何堪宅將邑：終不滿抑遂充足捆載以歸耶收之桑榆敢昧欣跋

又

某再啓相距終百里地歛向既重自常接武申叙雖不能旦暮亦足資藉他日之好目前紛擾殆人情所不堪加之哀病因仍常若有以制之是宜取踈置遠而惠頌曲敦鼎來翰墨累幅展轉如奉懇懇揆非所據不知愧汗濡浹而景佩相先則君子之庭不肖之跡可保其尚在也更一月可以造詣乃所願言糟粕不足以形容不審終踐所期已否

又

伏讀別紙具道尊府盛意并錄示行狀俾得紀次大門遺軌紬繹反覆愧不能已早時才卿崇班以和素之過亦嘗見及哀退久廢筆研加之巨題豈敢輒當具以是辭矣于是君子過予竟

不許迴避雖已聞命然乍病起忽、未完更望少寬庶能牽課
高文懿學自可表揚先烈而乃問道于冥行借聽于已曠似是
倒置皇悚皇悚

又

竊承受代非晚亦有意相過佩服盛義豈所堪者八月即在左
右或前駕庶幾猶及迎展尚幸遷就無致相失也跂向跂向

與龔平國

一水系望無異鄰牆投懷之懽實托舊物固當乘間就展與接
武交馳乃曠日持久才一通問其情固不如是而表見所期渠
得無所負耶念之殆不容少自寬而亦覲雅眷有以亮之至於

相惇免謂糟粕之傳不可以廢而加警焉庶幾翰墨間有一會
面之慰也秋日曠爽伏惟燕居優暇動履清勝老日不異平時
姑兀、取給目前以待盡耳尚冀摧頽或可支策遂有周旋披
寫之幸未間倍加保嗇苟可以寫之形容者無惜猥及

又

去歲蒙賜教尋具報比辱垂諭乃知今夏方到定將何處濡滯
然即因是再枉手筆累幅款盡如接更僕其為感浣可量纏繞
依田為生一水旱便覺費力不腆之託二年沉沒今秋粗理又
復暴漲可慮待哺噉、不知所以為策德門隨遇為生計亦如
我之窘常日佳况少而猥念多豈造化別有所命歟不然何特

于我輩加甚也古人未始以此自放帶經而鋤尚安知以彼輒
易政須吟哦妙悟叩牛角而為之節低徊稍休則寫之筆下豈
不綽々然有餘裕哉忝為蓋門下舊物也臨筆不覺縷々自餘
非會晤不展

又

別後雖再修馳鄙懷曾未披寫姑為目前所牽制而然要亦終
何補于系念哉葛大川來聞為况稍詳細繹賜書則情好有加
而不已眷言欣慕早朝于歲晚者于是弥厚重嘆慕為何以仰
對老秋日來起居萬福大水彌亘東南依山占高猶有幸免獨
吾邦瀕為一大湖始則微茫木末今更不知所涯際昔所謂稽

天者其在是乎徙家資寺已幾一月來之不早哀病遂為陰濕
氣憑陵憊々僅存視息使不失故常則別是一種境界方其嘯
咏自適過從不乏頗復及此搶攘否霜候可期日念歸壑盖周
旋勝踐實出素計要須還家乃克自浣大川忽相頌山間粗得
相溫日期甚迫而方病瘁加之翳晦不我為地作書如在夢寐
中所不到處與夫鋪叙失次庶幾矜照亦恃大川必能詳盡也

姑溪居士文集卷第二十二

書